

欽定大清會典事例

欽定大清會典事例卷一百七十一

戶部

田賦

酌留分儲備用銀

催科

催科期限

酌留分儲備用銀。○雍正五年覆准嗣後直省田賦戶部於每年春撥時將督撫冊報實存應解京餉銀內酌量地方之遠近大小賦銀存贖之多寡豫為留存以備該省不時之需其酌留之銀令該督撫等公分儲藩庫如有動用之處該督撫題明方准動用戶部仍於秋撥時再為酌留如有不行題請私相動用者將該督撫

布政使司。照擅動錢糧之例治罪。其餘實存銀數。均於春秋二撥案內。悉行解部直隸附近。

京師。布政使司庫。毋庸酌留帑銀。江蘇。安徽。江西。浙江。湖南。甘肅。四川。廣西。貴州。各布政使司庫。均酌留銀三十萬兩。福建。布政使司庫。酌留銀三十萬四百七十兩有奇。雲南。布政使司庫。酌留銀三十萬三千三百四十兩有奇。山西。河南。湖北。陝西。廣東。各布政使司庫。均酌留銀二十萬兩。山東。布政使司庫。酌留銀十萬兩。○八年。

諭。向於大宛二縣。各發帑銀萬兩。存貯縣庫。遇有速辦。

公事准其詳明府尹動支。近思辦理軍需之州縣。其急切應付。不容刻緩。而該州縣並無存貯備用之項。朕意欲於辦理軍需及事務繁劇之州縣。亦仿大宛之例。酌留帑銀。以備急切之用。其如何舉行。俾辦公有賴。而弊竇不生。著大學士等悉心定議具奏。欽此。

遵

旨議定。按省分之大小。撥給帑銀。自十萬兩至三十萬兩不等。分發府庫及直隸州庫存儲。其所屬州縣。如有急切公務。具文請領。該府州立即撥發。該州縣辦理之後。逐案據實開報。該府州具文。

申詳督撫布政使司覈實限每年歲終具冊咨部稽覈○十年議准各省將軍提鎮有急需公用之處一例於附近府州庫備用銀內支領○乾隆三年議准各省分儲帑銀有因軍需動用者有始終未經動用者若久儲不加察覈恐日後漸起侵虧於急切需用時轉多貽誤行令督撫酌量地方情形或仍應分儲或歸併司庫存留項下備用分析妥議咨部由部覆覈定議山東原撥分儲銀十有五萬兩均提歸司庫存儲浙江廣東及湖南所屬原撥分儲銀各十萬兩

福建二十萬兩。或係邊省海疆。或係衝繁孔道。仍於各府州庫分儲。以備急需。江南江蘇所屬。原撥分儲銀十萬兩。仍應分儲府州庫二萬兩。歸入司庫八萬兩。安徽原撥分儲銀十萬兩。仍應分儲府州庫五萬兩。歸入司庫五萬兩。江西原撥分儲銀十萬兩。仍應分儲府州庫三萬兩。歸入司庫七萬兩。湖北原撥分儲銀十萬兩。仍應分儲府州庫五萬兩。歸入司庫五萬兩。山西原撥分儲銀十有五萬兩。仍應分儲府州庫四萬兩。歸入司庫十有一萬兩。河南原撥分儲銀

十有五萬兩。仍應分儲府州庫二萬兩。歸入司庫。十有三萬兩。陝西原撥分儲銀三十萬兩。仍應分儲府州庫十萬兩。歸入司庫二十萬兩。甘肅原撥分儲銀三十萬兩。仍應分儲府州庫二十二萬兩。歸入司庫八萬兩。四川原撥分儲銀三十萬兩。仍應分儲府州庫二十萬兩。歸入司庫九萬三千兩。廣西原撥分儲銀十有五萬兩。仍應分儲府州庫六萬六千兩。歸入司庫八萬四千兩。雲南原撥分儲銀二十萬兩。仍應分儲府州庫萬有八千兩。歸入司庫十有八萬

二千兩。貴州原撥分儲銀二十萬兩。仍應分儲
府州庫三萬六千兩。歸入司庫十有六萬四千
兩。直隸原撥分儲銀十有五萬兩。仍應分儲府
州庫十有一萬兩。其餘四萬兩。司庫向無酌留
之例。提回造入季冊。報部候撥。以上分儲銀。令
該督撫嚴飭各府州加謹收儲。照雍正八年原
議辦理。提回司庫銀。歸入酌留項下。照雍正五
年原議辦理。○二十七年題准分儲屬庫備公
銀兩。各省情形不同。或酌量撤回司庫。或仍需
分儲屬庫。令各督撫悉心妥議。咨部由部覆覈。

定議直隸道府等庫共分儲銀一十五萬三千六百七十三兩有奇。山西府庫共分儲銀五萬兩。江蘇府縣庫共分儲銀八萬兩。江西府庫共分儲銀三萬兩。福建府庫共分儲銀一十萬兩。浙江府庫共分儲銀九萬四千兩。湖南府州庫共分儲銀七萬七千兩。陝西府州庫共分儲銀五萬兩。甘肅道府庫共分儲銀二十二萬兩。四川府廳庫共分儲銀五萬兩。廣東府廳州庫共分儲銀一十萬兩。廣西府庫共分儲銀六萬六千兩。雲南府庫共分儲銀一萬八千兩。貴州道

府廳州庫共分儲銀四萬一千兩。○三十二年
題准江蘇崇明縣孤懸海外向有儲備窖銀六
萬三千九百四十餘兩存儲窖內銀色變黑不
便久儲全數提解司庫撥用仍於司庫正項銀
內撥銀四萬兩發交崇明縣庫存儲以備需用
新舊交代照例盤查結報該管上司隨時查察
如有侵挪情弊嚴參治罪。○又議准烏魯木齊
提督庫內分儲銀三萬兩巴里坤總兵庫內分
儲銀四萬兩凡遇提鎮接任覈實題報平日統
歸提督查覈該督遇巡查營伍時一體確覈稽

查○三十六年奏准江蘇省江甯蘇州兩司庫
各添儲銀三十萬兩○四十六年覆准巴里坤
鎮庫原撥分儲備用銀四萬兩撥儲哈密協營
一萬兩仍儲鎮庫銀一萬六千六百三十五兩
其餘銀一萬三千三百六十五兩收儲司庫
催科○順治十年議准直省改折本省錢糧用
一條鞭法總收分解皆令官收官解不得仍累
小民永著為例○又議准截票之法開列地丁
錢糧數目分為限期用印鈐蓋就印字中截票
為兩一給納戶為憑一留庫櫃存驗按圖各置

一冊每逢比較查驗有票者免催未截者追比
○十八年覆准州縣徵收錢糧務將各區花名
繕造糧冊使納戶細數與一甲總額相符易於
摘催又州縣官不許私室秤兌各置木櫃排列
公衙門首令納戶眼同投櫃以免扣剋○又覆
准布政使司及州縣徵收錢糧均遵部頒法馬
秤兌毋令吏胥高下其手○康熙二十八年覆
准州縣催徵錢糧隨數填入印票一樣二聯不
肖有司與姦胥通同作弊藉名磨對稽查將花
戶所納之票強留不給遂有已完作未完多徵

作少徵者。今行三聯印票之法。一存州縣。一付差役應比。一付花戶執照。嗣後徵收錢糧豆米等項。均給三聯印票。照數填寫。如州縣勒令不許填寫。及無票付執者。許小民告發。以監守自盜例治罪。○三十九年題准。徵糧設立滾單。於納戶名下註明田畝若干。該銀米若干。春應完若干。秋應完若干。分作十限。每限應完若干。給發甲內首名。挨次滾催。令民遵照部例。自封投櫃。不許里長銀匠櫃役秤收。一限若完。二限挨次滾催。如有一戶沈單不完。不繳。查出究處。○

四十二年覆准。州縣徵收串票內分別註明漕
項地丁數目。如蒙混徵比。該督撫即行指參。
雍正元年議准。各省督撫於州縣開徵之始。令
該府遴選賢員。與該管官同封銀櫃。或十日二
十日。別委賢員或佐雜教職。當衆拆封。立即起
解。其存儲倉穀。按季盤查。出結轉報。如有徇隱。
將該府並委員題參議處。○二年

諭。民間輸納錢糧。用自封投櫃法。亦屬便民之道。但偶
有短少之處。令其增補。每致多索。其數浮於所少之
外。理應將原銀發還。仍於原封內照數補足。交納庶

可免多索之弊。此雖細事。督撫大吏亦不可不留心體察。嚴飭有司以除民累。又議准徵收卯簿。行令各省督撫嚴飭各屬。務須親對完欠。毋得假手戶房書吏。儻有怠翫。即行題參。三年議准徵收錢糧。令各省布政使司嚴督各州縣。務須查明的戶實徵數目。及親查欠戶次第摘催。更刻四聯串票。一送府。一存串根。一給花戶。一於完糧櫃旁別設一櫃。令花戶完銀時自投櫃中。每夜州縣官取出對流水簿。勾銷欠冊。四年覆准州縣徵收錢糧。不親同拆封。致濫捉短封。並

不發原銀者督撫不時糾叅從重治罪。○八年覆准。嗣後州縣徵收糧米之時。豫將各里各甲花戶額數的名。填定三聯版串。一給納戶執照。一發經承銷冊。一存州縣覈對。按戶徵收。對冊完納。即行截給歸農。未經截給者。即係欠戶。該印官檢摘追比。若遇有糧無票有票無糧等情。即係胥吏侵蝕。立即監禁嚴追。各直省督撫轉飭所屬有漕州縣一例遵行。○十一年議准。十截串粟銀數多寡。難以豫定。且拆封盤查亦難覈算。徒開胥吏飛灑弊端。例應停止。仍照舊用。

三聯串票徵收。○又議准稽查州縣虧空。令佐貳監收。每晚照日徵流水簿。將所收數目。記一清單。十日一次開報本管道府稽查。如無佐貳之州縣。即令學正教諭計單開報該管道府。該管道府原有不時稽查之責。不必俟州縣申請拆封。或半月或一月。不時委官會同教職秉公拆兌。如有虧空。立即揭報叅處。○又議准零星錢糧。一錢以下之小戶。每銀一分。完制錢十文。每銀一釐。完制錢一文。大戶一錢以下之尾欠。並拆封短少。概准完納制錢。○十三年覆准直

省州縣小戶錢糧數在一兩以下住址去縣遠者照小戶零星米麥湊數附納之例將錢糧交與數多之戶附帶投納於納戶印票內註明如數在一兩以上及為數雖少而情願自行交納者仍遵例自封投櫃。○乾隆元年

諭朕聞永平府屬州縣凡徵收錢糧皆以錢作銀每銀一兩連加耗羨銀一錢五分共折制錢一千一百五十文現今該處錢價昂貴民間納錢比之納銀為費較重朕思民間完納錢糧銀數在一錢以下者向例銀錢聽其並用原以便民若數在一錢以上又值錢

價昂貴之時亦令交錢轉致多費是便民而適以累民殊不妥協著直隸總督飭令各屬民間完納錢糧在一錢以上者不必勒令交錢在一錢以下者仍照舊例銀錢聽其自便○二年覆准徵收一應雜項錢糧令納戶包封自投入櫃屆期一同監拆如有需索及留包偷取等弊即行參究○四十八年議准浙江各州縣多納糧米照江蘇之例飭令各屬查明各該處區圖形勢編立次第於秋收時先行明白曉諭按次依限赴倉交納仍遵定例於十月內即行開倉交收其有收割較遲之

處令地方官查明分別辦理。五十七年議准州縣經徵錢糧。詳請拆封後。責成各道府查覈實徵銀數。飭令即行解交藩庫。其以次遞徵已及成數者。亦即儘收儘解。統計一年徵收銀數。截至年底為止。令該管道府將各州縣經徵底簿及花戶串根。詳細檢查。實在已完若干。民欠若干。據實開報。各該督撫即取具藩司道府甘結。於開印前報部存案。僕道府所查完欠數目。與州縣月報旬報不符。點查銀數短少。即行據實揭報。嚴參治罪。如該管道府有意通同徇隱。

亦即一併嚴參。○嘉慶四年

諭錢糧一項例應民間自封投櫃。久經嚴禁私設官店。以杜浮收。其鄉民內向有折交錢文者。若竟行禁止。恐小民不諳銀色。反受胥吏愚弄。各督撫務於開徵之先。按時價覈定換銀上庫之數。每兩徵收大錢若干文。出示曉諭聽民自便。毋許絲毫浮收。○七年議准州縣額徵本色南秋糧米。查照徵銀之例。責成徵收監放各員。親身赴倉查驗。毋得假手胥吏。以杜弊端。○九年奏准各直省州縣徵收地丁一切錢糧。每年截至年底。將已未完錢糧數

目於次年開印前。一面遵照定例報部備查。一面專摺具奏。以備酌撥。二十一年覆准。甘肅省各屬。以小麥粟米豌豆為上色。糜子青稞大豆為下色。鹽茶廳秦州階州涇州安西靜甯固原甯州皋蘭金縣渭源靖遠隴西甯遠伏羌安定會甯通渭西和平涼隆德華亭安化正甯合水環縣秦安清水禮縣文縣靈臺崇信鎮原。主門敦煌肅州州同。三岔州判莊浪縣丞。以上三處全徵上色。循化莊浪貴德巴燕戎格各廳及岷州丹噶爾主簿。以上六處全徵下色。花馬池州同徵

上色九分。下色一分。平羅縣徵上色八分。下色

二分。肅州靈州甯夏甯朔中衛以上五處徵上色七

分。下色三分。永昌鎮番古浪以上三處徵上色六分。

下色四分。河州高臺以上二處徵上色五分。下色五

分。平番張掖武威以上三處徵上色四分。下色六分。

撫彝廳狄道州西甯碾伯大通山丹東樂縣永

以上七處徵上色三分。下色七分。洮州廳漳縣沙泥

州判以上三處徵上色二分。下色八分。西固州同徵

上色一分。下色九分。○道光九年奏准江蘇省

歸公灘地墾種起科之後。即應徵租。按其所得

花息概收折色。酌中定議。照課銀之數加七起租。如上田課銀每畝九分一釐者。加銀六錢三分七釐。共應徵租銀七錢二分八釐。分作八成銀九分一釐完課。以六成銀五錢四分六釐解司。尚餘一成銀九分一釐。作為一切公費。其餘各照科則輕重。分別增減。由各廳州縣設立三聯版串。填明佃戶姓名。徵租錢數。於每年十一月初一日啟徵。先期飭令洲保催輸。令各佃戶自行交納。儘徵儘解。統限於次年五月底全完。如有未完。照雜項錢糧例。覈計處分。儻有侵蝕。

即照虧缺帑項例嚴行參辦。○光緒元年奏准奉省旗租草豆向以六畝為一日每日止徵東錢一千一百二十文合之制錢僅一百八十餘文所有正餘各款一併在內此外不得復立名目稍涉參差。

催科期限。○雍正八年

諭陝西四川民風淳樸。歷年逋賦甚少。按每年徵收錢糧之期。四月完半。十月全完。此定例也。朕思四月十月既屆完納之期。小民必須豫先經營。是麥穀未收之時。即為輸將之計。或因稱貸而受剝於富豪。或因

豫糶而太虧其價值。且於甘肅地方有徵收本色者。若在糧穀未穫之前。更為竭蹶。歷來川陝錢糧既無。拖欠陋習。著將四月完半者。寬至六月。十月全完者。寬至十一月。俟夏麥秋禾築場納稼之後。從容完課。俾民力紓徐。以副朕愛養黎元之至意。○十三年議。准徵收地丁銀。仍照舊例。二月開徵。五月停忙。八月接徵。十一月全完。至賦稅出自田畝。而物土之宜。樹藝穀麥。紡績絲布。收穫成就。早晚多寡。各省不同。令督撫按照地方情形。酌量徵收。不必拘定四月完半之數。其花戶錢糧。在一兩。

以下者皆係田畝無多生計不足之人若完不足數即緩至八月接徵全完其力能完半者仍令照數完納。○乾隆二年題准浙江杭嘉湖三府屬南米向係春徵四分於冬季辦漕之後復加催輸嗣後自三年為始應徵南米隨同漕米於十月起一併徵收分別兌運解給其催徵南米各官於十一月初一日起至次年三月底以六月計算應徵月日分數造冊題銷。○嘉慶三年議准浙江牧廠漲復新沙俱坐落塘外佃民交夏後始能到地翻犁八月成熟九月開徵若

照原議十月全完。催輸未免過迫。定限於本年
九月開徵。次年四月埽數全完。二十年奏准
各州縣應徵上下忙錢糧。除例准留支及實欠
在民外。所有徵存屬庫銀兩。儘數提解司庫。其
上忙應四月完半者。限五月底。六月完半者。限
七月底。下忙限十二月底截清。解司銀數。按限
造冊送部查覈。所有上下忙解司銀數。送部款
冊。令藩司覈明。州縣每年額徵錢糧。本年徵過
若干。各未完若干。其已完銀內。州縣應留支若
干。實應解存司庫報部候撥若干。又節年緩帶

徵錢糧徵獲若干。仍未完若干。分別正課雜項。各歸各款。造具簡明冊。依限詳報督撫查覈。該督撫即於二十日內專摺具奏。將原冊一併送部。遲逾參處。並責成承辦司員。按款詳細登記印簿。俟該省春秋二撥及奏銷各冊到日。逐一覈對。遇有送到州縣交代冊結。隨時抽查。儻有已徵未解情弊。除州縣參革治罪外。並將該督撫藩司一併嚴參。其銀兩著落分賠。二十一年奏准貴州省酌定。以年底完半作為上忙。次年三月作為下忙。通飭依限完解。○道光二十

九年奏准各省上下忙解司錢糧截數限期除廣東於次年正月雲貴二省於次年三月仍照舊例截數外其餘各省均應於本年十二月底截清已未完數目造冊詳報由藩司覈明上下忙共實徵若干共未完若干其已完銀內州縣留支若干解司若干已收司庫者應解部若干報撥若干同節年緩帶徵錢糧已未完解各數分別正項雜項造具簡明清冊依限於封印前詳送督撫該督撫覆覈以二十日為限即於次年開印後專摺具奏冊並送部不得遲至奏銷

屆期始行奏報。遲逾叅處。○同治七年奏准閩省自被擾以後。徵冊散失。前已奏明飭行各屬就田問賦。現在次第滿限。所有刁頑欠戶。亟應照額催徵。惟無著糧賦。招丁認墾以前。若概向現年墾戶追呼。恐滋弊竇。應飭查明清釐田賦各屬。招墾舊田。惟以現年輸糧。其清釐限內未經墾復以前之積欠。即予全數蠲免。庶足鼓舞墾戶之心。於催科不無裨益。○光緒十二年奏准山西豐鎮甯遠和林格爾清水河歸化等五廳。經徵各項地租。各歸各廳開造額徵。及已未

完數目。通計分數。開具職名。於次年九月。由道
彙齊咨司。覈明於十一月。詳請題銷。

欽定大清會典事例卷一百七十二

戶部

田賦 歸轄改徵 催科禁令

歸轄改徵○康熙十二年覆准貴州錢糧向係府縣分徵並無經徵督徵之異今以貴陽思南鎮遠銅仁安順都勻平越州改七府所徵錢糧

各歸附郭之縣經徵知府止司督徵之責俾畫一遵行○雍正六年覆准順莊編里開造的名如一人有數甲數都之田分立數戶之名即歸併一戶或原一戶而實係數人之產者即分立

的戶花名至田畝未經售賣而住址遷移者舉報註明收糧時一併改正田坐彼縣而人居此縣者就本籍名色別立限單催輸○又題准陝西綏德衛地雜處於綏德米脂清澗三州縣及榆林十營堡之中將近州者改歸州轄近縣者改歸縣轄其三屯衛地近各堡者改歸各堡管轄應徵本折銀米糧草歸各堡新設文官徵收轉解又延屬東路建安高家三堡係葭州所屬柏林大柏油水興三堡係神木縣所屬鎮羌孤山木瓜園三堡並清水皇甫二營係府谷縣所

屬將此十營堡倉糧改歸所屬州縣徵收。又
題准福建省泉州府同安縣廈門地租銀二千
七百十有七兩。自雍正六年為始改歸廈門同
知就近徵收報銷。○七年

諭聞直隸地方有寄莊寄糧之弊。往往地寄此處糧寄
他處。相隔百餘里。或數百里之遠。即如宣化府懷安
縣有人地皆在懷安。而寄糧於萬全宣化者。有人地
皆在萬全宣化。而寄糧於懷安者。更有現在懷安納
糧。而寄地於順天府之寶坻。相隔五百餘里者。在徵
糧者則鞭長莫及。而寄地者則彼此無關。脫漏欺隱

之弊勢所不免。有司實難稽查。催徵朕之所聞如此。著直隸總督詳查。若果有此等事。應作何更正。改隸之法。悉心妥議。具奏。再各省有如此寄莊寄糧者。著該督撫亦詳查定議。具奏。欽此。遵。

旨議定。奉天。湖北。貴州。並無寄頓之弊。雲南各府州縣所轄地方。人戶田地。雖有犬牙相錯。而程途居址。不甚遙隔。與寄莊寄糧不同。輸納已久。未便改隸。所有直隸。山東。山西。河南。江蘇。安徽。江西。福建。浙江。湖南。陝西。四川。廣東。廣西等省。寄莊寄糧民屯田地。應徵銀米等項。自丙辰年為始。

悉加更正。就近徵糧。按額報解。○又議准直隸所屬延慶萬全赤城三州縣及張家獨石二口。歲需不敷米一萬四千七百石。零向就保安懷來幽甯蔚懷安龍門等州縣撥運協濟。未免輸輓艱難。嗣後除存留本屬支用米數。仍照舊徵收本色外。其應撥米數。自七年為始。改徵折色。每石折銀一兩。解交不敷州縣折給兵丁。儻遇米貴之年。查明請

旨。○八年題准四川打箭鑪口外番糧。專責明正土司徵解。○又議准甘肅階州所屬之南平石門。

二里民地並額徵地丁銀二百九十兩六分遇
閏加銀二兩四錢五分歸併附近之西固同知
徵解報銷○又覆准奉天府所屬遼陽復海城
蓋平等州縣共收岫巖地三百四十頃八十八
畝一分又遼陽蓋州徵收鳳凰城民地並附近
岫巖地共六百二十二頃二十五畝九分皆雜
城遙遠小民納米輓運維艱自雍正八年為始
改徵折色確查地畝科條分別上中下三則徵
收報銷○九年題准陝西更名錢糧地畝散處
各州縣向係糧道徵收銀解藩庫糧給兵食納

戶零星不能親身赴省多係戶首包攬勒派又屯衛撥運及民地項下存留之糧雖係州縣徵收仍由民運均與民不便准其於所屬之州縣徵收運解其咸陽等州縣應需運價於耗糧折徵銀內支給長武等州縣每石折銀一兩不敷豌豆於糧道折收銀內採買支給不敷之米令咸長二縣於糶三穀內碾米支給秋收後將所收之銀買穀運倉○又題准山東邱縣五營地方大糧寄莊地二百四十八頃五十畝八分零額徵銀九百十有八兩四錢六分零本色米並

麥改米二百四十七石五斗三升零。遇閏月應徵銀七分六釐零。米六斗七升零。又學田地三十三畝二分零。應徵銀二兩六錢五分有奇。自雍正九年為始。改歸直隸廣平縣管轄。照額徵收報銷。○又題准四川打箭鑪口外化林協標。兌給兵糧。歸於雅州府同知督催兌支。○十年題准廣西思明土府。江州憑祥上下石西各土州。羅白土縣上下二龍司。額徵銀糧。自雍正十年為始。改歸附近之太平府徵解。其各土屬流官俸工。亦赴太平府支領。利州銀糧。亦自雍正

十年為始改歸附近之泗城府徵解報銷○十
一年題准江南江甯府官基地租額徵銀豆屬
上元者歸上元縣徵收屬江甯者歸江甯縣徵
收○十三年題准廣西鎮安府屬之小鎮安改今
縣所轄民田五頃七十九畝零改歸順州就近
管轄每年應徵銀糧照數徵收解司充餉○又
題准奉天府所屬復州之復盛復甯復古三社
地二萬一千一百八十六畝應徵糧米島居之
民輓運甚難改徵銀四百四十四兩九錢零甯
海所屬之積金社地八千一百三十四畝應徵

糧米向附於別社徵輸今改徵銀一百七十兩
八錢有奇。○乾隆元年覆准福建寺田有係官
掌者其租原以四分給僧養贍六分歸官代僧
納糧今將寺田全歸僧收停止官掌每畝應徵
銀二錢即向僧人催徵造冊報銷。○又題准福
建福州興化泉州漳州延平建甯汀州福甯等
府同知通判所徵屯田共銀萬三千七百九十
九兩有奇米萬二千二十二石內汀州府同知
額徵屯田有江西信豐縣寄莊屯田屯丁銀五
百四十三兩七錢八分改歸江西信豐縣徵解

其餘屯田各勘明田畝坐落之州縣自乾隆元年為始就近分歸各州縣徵收報銷如有田歸民耕而仍列故軍老戶者即改正的名按戶催輸○二年題准直隸河間府經歷徵收河間等州縣屯米支給兵糧改歸各州縣就近徵收○又題准

盛京所屬原納紅冊地今丈出餘地除復州金州鳳凰城原徵粟米及

盛京倉應徵草豆每年供應

三陵祭祀牲牢動用草豆毋庸改徵外其熊岳岫巖蓋

州等處並無支用草豆。今改徵粟米。開原、遼陽、錦州、義州、甯遠等處除撥給各處站草四萬四千九百餘束外，餘均改徵粟米。每豆一斗改徵粟米一升。草一束改徵粟米一石。○又奏准江甯京口駐防官應支俸內白米向係蘇、松二府編徵解給。民間輸納白糧費用繁重。嗣後改徵漕米。所需白米酌減以杭米抵給。並存撥別營兵米一概改徵杭米。照例解赴抵給。○三年題准山東邱縣五營地方改歸直隸廣平縣管轄。額徵漕米並遇閏月應徵之米直屬向無漕運。

照山東漕折定例自乾隆三年為始歸入地糧
項下徵解司庫造報○又題准浙江改折顏料
蠟茶絲等項自乾隆三年為始遵照現今估定
價值於開徵前纂入由單頒發催輸照則完納
仍將各款價值編纂全書更正開載○五年題
准江南安徽所屬之石埭縣撥徵兵米二百十
有九石六斗田戶奇零輸納維艱改隨丁地折
徵解司其兵米仍於貴池縣南米項下撥給○
又題准浙江錢塘江入海之處兩山夾峙一為
南大壘一為中小壘兩壘之中漲出沙地九百

三十頃五十八畝一分六釐。原與海甯縣今改

為州

地界毗連。應徵租銀。悉歸海甯縣徵收。造報。

七年題准。陝西甘肅所屬之慶陽衛。額徵粟米。地畝多在高山坡坎之間。可種粟米者僅十之一二。其餘止堪樹藝。麥豆。嗣後將米一斗改徵粟米二升。麥四升。豆一升。又題准。江南每年額解江甯府折色南豆一萬五千二百四十四石二斗八升有奇。以供駐防織造官兵秣馬之用。今將安徽所屬之當塗蕪湖二縣額徵南豆。每石折銀一兩一錢。宣城涇貴池銅陵東流五

縣並江蘇所屬之上元江甯句容溧水高淳額徵南豆每石折銀一兩二錢溧陽額徵南豆每石折銀一兩一錢七分共徵豆銀萬八千五百六兩四錢八分七釐秋成委官購買運倉支給餘銀存儲司庫造報○四十二年議准

盛京戶部所屬莊頭承種官地二十八萬九千九百八十畝除交供應

三陵祭祀正項糧石棉鹽之外仍按伊等領種官地照旗人地畝按畝交納米豆草束較之旗人承種地畝並無別項差徭僅交地糧者殊屬艱苦嗣

後照

盛京內務府並錦州副都統所屬莊頭交納官地
每米一石折銀四錢草一束折銀三釐豆一石
折銀二錢交庫充餉○四十八年議准凡寄莊
田地每年開徵之始令經徵州縣逐一查明開
造村莊戶名錢糧數目清冊移交住居之州縣
代行催徵如至奏銷未完即將代徵之員開參
議處○四十九年議准陝西興安州改為興安
府其興安州舊額分儲銀三千兩寄存漢中府
庫今改設府署准其撥歸興安府庫以備緩急

○五十五年議准山東直隸州州縣孤懸村莊距本縣甚遠距鄰縣轉近其零星小戶應納錢糧本屬無多而遠越邑治盤費浮於所納易啟抗延包攬之弊於乾隆五十六年為始地畝錢糧改歸就近州縣管轄所有濟甯州蕭家莊大糧地一頃四十四畝八分額徵銀三兩三錢九分一釐米七斗四升五合八勺改撥曹州府菏澤縣就近管轄武定府惠民縣呂家等七莊共大糧地一十九頃八十一畝七分三毫三絲一忽額徵銀一百三兩四錢三分四釐米三十一

石二斗八升九合一勺改撥商河縣就近管轄
青城縣竇家莊大糧地一頃六十二畝五分五
釐二毫三絲五忽額徵銀九兩二分一釐米二
石三斗一升四合一勺改撥惠民縣就近管轄
樂陵縣崔家劉家二莊共大糧地一頃三十九
畝三分八釐一毫額徵銀三兩二錢三分三釐
米一石一斗七升五合一勺乾隆二十四年潮
淹驗廢奉文豁除改撥海豐縣就近管轄商河
縣張廟莊大糧地一頃一十九畝三釐四毫一
絲八忽五微額徵銀四兩九錢一分七釐米一

石八斗五升六合一勺。改撥濟南府濟陽縣就
近管轄兗州府鄒縣李家集大糧地二頃九十
四畝九分九釐額徵銀一十兩五錢三分一釐
米四斗七升三合六勺經紀三名歲徵課程牙
雜銀一兩三錢七分二釐改撥壽張縣就近管
轄嶧縣前坡村大糧地七十五畝七分三釐六
毫額徵銀一兩四錢二分四釐米六升四合改
撥滕縣就近管轄汶上縣西五鄉二百三十五
莊共地一千六百九十五頃九十五畝一分九
釐二毫三絲三忽內徵糧地二百四十一頃八

十五畝三分八釐三絲三忽額徵銀六百六十
八兩二錢三分四釐米一百五十石八斗三升
二勺民糧地一千四百五十四頃九畝八分一
釐二毫額徵租銀八百八十七兩三分一釐紙
紅公費銀二百六兩三錢改撥壽張縣就近管
轄山家等八莊共大糧地一十八頃四十畝一
分一釐六毫三絲額徵銀五十兩八錢四分一
釐米一十一石四斗七升五合六勺改撥曹州
府鄆城縣就近管轄陽穀縣黨家店大糧地一
十頃一十九畝三分額徵銀四十二兩一錢三

分八釐米八石六斗七升二勺改撥壽張縣就
近管轄曹州府河澤縣焦家莊大糧地一項一
十二畝二分六毫額徵銀二兩五錢五分五釐
米四斗三升三合五勺改撥定陶縣就近管轄
沂州府蘭山縣馬蘭屯大糧地五十八頃七十
八畝二分五釐七毫五絲額徵銀一百二十兩
八錢三分三釐經紀一名歲徵牙雜稅銀二十
四兩三錢二分改撥兗州府嶧縣就近管轄仲
溝等七屯莊共大糧地五十三頃五畝三分五
釐八毫額徵銀一百九兩一錢八分八釐米八

升五合三勺。改撥費縣就近管轄。青州府高苑縣南寄馬莊大糧地七頃二十八畝一分八釐。額徵銀二十九兩九錢七釐。改撥濟南府新城縣就近管轄。萊州府高密縣楊家屯大糧地六頃六十三畝八分四釐六毫。額徵銀一十一兩七錢一分三釐。改撥青州府諸城縣就近管轄。即墨縣即墨旺莊大糧地二頃五十五畝三釐。額徵銀七兩五分一釐。米二斗九升四合七勺。改撥平度州就近管轄。登州府榮成縣窯南坡村大糧地七頃九十七畝。額徵銀一十四兩七

錢四分一釐。改撥文登縣就近管轄。濟甯州嘉祥縣五里雜姓三屯莊共大糧地六頃六畝三分五釐。額徵銀一十二兩五錢五分七釐。米一石一斗三升七合七勺。改撥曹州府鄆城縣就近管轄。直隸滄州譚家莊大糧地四頃七十二畝九分五釐三毫。額徵銀一十兩六錢八釐。改撥山東武定府海豐縣就近管轄。鹽山縣高家田家三莊共大糧地四頃九十七畝三分八釐九毫一絲九忽。額徵銀一十六兩四錢八分八釐。改撥山東武定府海豐縣就近管轄。○又奏

准奉天牛莊遼陽蓋州熊岳四城界轉運附近
之內倉遼陽倉地米二千五百四十一石三斗
零按一米一豆改徵黑豆俱歸入牛莊旗倉委
員運通○又奏准

盛京戶部莊頭等應交稗一萬二千三百六十餘
石除支放外尚餘稗四千石改徵折色於乾隆
五十五年為始每石折銀二錢二分○五十七
年議准河東鹽課改歸山西陝西河南等三省
行鹽州縣地丁款內攤徵○又奏准河東鹽課
改歸地丁應分省徵解其河南唐縣歸公銀一

萬二千四十三兩六錢五分四釐。裕州歸公銀一千兩。山西潞州、澤州節省銀二萬兩。均令徵解。各本省藩庫報撥。毋庸仍解內務府。又安邑縣。復縣聞喜縣。絳縣。向解運庫之麥租。蘆價等銀一千九十二兩六錢四分三釐。一體改解藩庫。其運司經歷徵收麥租。亦改歸安邑縣就近徵解。○五十九年議准。陝西延安、漢中、榆林、鄜州、綏德、五府州所屬三十一廳州縣。應徵鹽課銀八千九百八十餘兩。一併改歸地丁項下攤徵。○嘉慶十八年題准。浙江海甯州屬南沙地。

畝改隸蕭山縣管轄如有漲阜新沙查係原坍漲復仍歸海甯州原業認種若係天漲新沙准歸蕭山縣民認種均不得妄行爭執○二十年題准浙江蕭山縣南沙境入官沙地一萬一千七十五畝每畝徵銀一分四釐按年造冊題報查覈○二十四年咨准福建臺灣府各屬經徵叛產租銀嗣後改歸臺灣府經徵按年造冊報部○道光三年

諭前據綉武布奏請將牙木什租銀歸吐魯番同知徵收其圍城地畝請仍賞給滿營照舊收租朕因此事

辦理兩歧。諭令英惠覆加查覈。據實具奏。茲據該都
統查明圍城牙木什地畝均係陸續增墾之地。所收
租銀自應一律入官。方為覈實。所有圍城地租銀四
百三十餘兩。著自道光三年為始。一併飭令同知衙
門徵收。入於經費項下。作正開銷。仍撥出銀一百四
十兩。給予滿營。作為義學束脩及獎賞幼丁等項之
費。按年報部備查。以昭畫一。○光緒元年。奏准甘肅
循化廳屬買吾等八族番民改歸洮州管轄。每
年應完循化廳錢糧。自同治十三年起。撥歸洮
州廳徵收。○二年。議准熱河圍場地。面寬廣。分

隸承德等府州縣並多倫諾爾廳各界現添設同知等官俾資整頓所有圍場開墾荒地應徵租銀自光緒三年起歸該同知徵收年終具題設立考成冊數計已未完分數開具職揭一併送部如有未完經徵催徵及督徵各官均照旗租處分題參○又奏准

盛京鳳凰城巡檢改為鳳凰直隸廳分岫巖廳洋河以東鳳凰城守尉所屬地面悉歸管轄改岫巖廳撫民通判為理事同知管知州事並安東縣統歸鳳凰廳屬從前岫巖未報升科之地即

由鳳凰廳妥為清查。

催科禁令。○順治元年題准。官吏徵收錢糧。私
加火耗者。以犯贓論。○二年題准。各官莅任鋪
設銀。嚴行禁革。違者究治。○九年覆准。直省錢
糧。應按期徵解。有豫徵滋擾者。督撫指叅。○十
年題准。州縣官不許用孤貧衙役恃老行兇。下
鄉催徵。○十二年

恩詔。各地方錢糧。凡橫斂私徵。暗加火耗。荒田逃戶。灑
派包賠。非時豫借等弊。嚴行禁革。違者督撫糾叅。○
又覆准。江南財賦繁多。經收諸役。包攬侵漁。保

長歌家朋比剝民令嚴行查訪勒石永禁○十
五年覆准文武鄉紳進士舉人貢監生員及衙
役有挖欠錢糧者各按分數多寡分別治罪如
州縣官徇庇督撫題參督撫容隱科道糾劾○
十六年覆准民抗田賦逃竄隔屬許本管官申
請府道徑行稟提如有阻撓督撫究治○又覆
准有司藉稱徵糧令里中僉報大戶派納銀米
傾蕩家產又於正額外立常例名色私斂屬民
者嚴行禁革○十七年覆准有司私派里中奉
承上司凡日用薪米修造衙門供應家具禮物

及募夫馬民壯。侵蝕婪飽等弊。通飭嚴禁。○又題准州縣奏銷時。註明紳衿衙役所欠分數。造冊申報。督撫題叅以懲積翫。○又題准江南紳衿。有本戶並無田土。他人假冒立戶者。有錢糧已完。吏役混開者。果屬冤抑。許訴理開復。經手官役及院司道府。分別議處。○康熙三年。題准州縣官徵收錢糧。將已完者。挪用捏稱民欠。並加派私徵者。革職提問。該管之司道府。徇隱不報者。革職。若已經詳報。督撫徇縱不叅者。降五級調用。○又覆准州縣錢糧上司。動用差提名。

為提手。種種需索。行令嚴禁。○四年題准州縣官額外科斂。上司徇隱不報。許里長甲首小民據實控告。○五年覆准徵收錢糧。原係州縣印官專責。不得濫委府佐及州縣丞倅協徵。滋擾如道府私委督撫指叅督撫濫委科道糾劾。○六年覆准直省正賦皆有定額。地方官遇有別項。輒令設法。名為設法。實則加科。嗣後設法名色。永行禁止。○又題准直省錢糧款項。咨題違錯。駁令覆覈。在外各官。每藉名部駁。私斂百姓。並衙役侵擾情弊。責督撫糾叅。○八年覆准嚴

禁知府親至州縣徵糧以杜供應需索之弊。○
十三年覆准州縣應徵錢糧許司道行文立限
催提不得差役擾害。○十五年題准州縣火耗
加派被旁人首告經司道府官審出其失察之
罪免議。○十七年議准州縣官籍造冊為名收
取費用科斂累民及任意灑派補庫變賣倉糧
甚且藉稱錢糧准算部民子女轉送與人者革
職提問該管司道府隱匿不報或已申報督撫
不題叅者皆照不叅私派例處分。○又覆准州
縣官剋取火耗加派私徵及司道府徇隱不報

者皆革職提問徇縱不叅之督撫革職○又覆
准州縣官隔年豫徵錢糧照私徵例治罪司道
府明知不報或已申報督撫不題叅者皆照例
議處○十八年覆准小民完糧州縣官不給印
票照私徵例治罪司道府隱匿不報或已申報
督撫不題叅者皆照例處分○二十九年題准
山東紳衿戶下地畝不應差徭遂有姦猾百姓
將地畝詭寄紳衿戶下因而衙役兵丁效尤免
差更有紳衿包攬錢糧將地丁銀米包收代納
耗羨盡入私橐官民皆累合照欺隱田畝例通

限兩月將從前詭寄地畝盡行退歸業戶其紳
衿本名下田畝令各具並無詭寄甘結存案○
三十一年覆准湖南陋習里甲之中分別大戶
小戶具大戶將小戶任意欺壓錢糧皆大戶收
取不容小戶自封投櫃甚且驅使服役嗣後小
戶令出大戶之甲別立里甲造冊編定親身納
糧如有包攬抗糧勒索加派等弊該督撫題參
治罪○三十九年題准直省府州縣陋規雜派
有遇差役因公濟私以一派十者有年節派送
禮儀者有郡守之交際派之各屬者有府縣衛

所官出門中火路費及跟役食用派之里民者
有上官差使往來派送規禮下程者有起解餉
銀派出解費者又道府有開徵奏銷之陋規徵
漕有監兌下縣及差人坐催之規例凡此陋習
一概革除○又題准徵收錢糧有公然科斂者
閩邑通里共攤同出名曰輓擡各里各甲輪流
獨當名曰硬馱姦胥土豪包攬分肥苦累小民
皆勒石永禁○雍正二年

諭百姓完納錢糧當令糧民戶戶到官不許里長甲頭
巧立名色希圖侵蝕聞有不肖生員監生本身原無

多糧倚恃一衿輒敢包攬同姓錢糧以為己糧秀才
自稱儒戶監生自稱官戶每當地丁漕糧徵收之時
遲延拖欠不及輸納通都大邑固多而山僻小邑尤
甚該督撫立即嚴叅曉諭糧戶除去儒戶官戶名目
如再有頑抗生監即行重處毋得姑徇儻有瞻顧不
力革此弊者或科道官叅劾或被旁人告發必治以
重罪○又議准直省督撫嚴飭州縣官凡供應上司
藉端橫斂一應陋規盡行革除儻仍蹈前轍督
撫指叅按律處分○又議准地方官徵收田賦
令酌量銀數多寡擇信實銀匠數人連名互保

聽民投鋪傾銷。不許包攬。如有不肖州縣設立當官銀匠。藉官累民者。嚴行禁止。並除承充陋規。如有包攬需索等弊。本官失察。即行題參。○三年議准。直省督撫通飭各屬。嚴禁州縣官收取蠹書禮物。縱容勒索票錢。犯者督撫指參。州縣官以犯贓論。胥吏從重治罪。○五年議准。貢監生員。非本身錢糧。包攬代納。入己。以致拖欠者。不論分數。均黜革治罪。若包攬拖欠。至八十兩者。計贓以枉法論。其包攬雖無拖欠。亦即黜革。再照所納之數。追罰一半入官。至愚民希圖

自便聽人攬納者。照不應重律治罪。仍追包攬之數入官。其不行查出之該管官。罰俸一年。○又覆准江南各州縣經徵積弊。每開徵時。於經承中僉點一名為總書。皆係姦胥承充。行令該督撫將總書名色革去。選擇書辦十數人分圖管理。每圖每甲設立印簿二本。令花戶自註完納於每限下。以杜隱閣飛灑之弊。其每年帶徵錢糧限三月澈底清釐。刊示曉諭。○六年覆准紳衿應納之糧。於印簿及串票內註明紳衿某人字樣。按限催比。奏銷時將所欠分數逐戶開

出列冊詳報照紳衿抗糧例治罪如州縣不列冊詳報照徇庇例議處○又議准各標目兵抗賦州縣官將未完數目開明移會本管官弁追完交解如不實力催追照州縣徵收錢糧未完例議處○又覆准上司書吏抗賦州縣一面詳報一面嚴拘革役追比如本管上司阿庇袒護及州縣瞻徇皆照徇庇例議處○八年議准文武生員貢監生應納錢糧數目令州縣別造一冊送學臣鈐印頒發每完若干照數註明按季申送查覈○乾隆元年題准州縣收納錢糧務

照定例令納戶包封自投入櫃不許收書一涉其手如有姦胥違例留包偷取情弊該管府州即揭報題叅○四年

諭廣東徵收糧米支給本省兵食民間因名為兵米聞向來州縣官皆折收銀每一倉石照時價多收銀六七錢至加倍不等收銀之後另買稻穀碾米給兵其買穀或派富戶或派米鋪每石又照時價短發一錢或數分不等甚至有富家希圖結交因事請託並不領價者似此一出入之間多收少發小民何堪賠累之苦即云遙遠之地折色徵銀亦可免其輸將量

議加增。以為運腳。亦民所樂從。然藉端需索。為數太多。則事之必不可者。著該督撫悉心查禁。務令公平。辦理。儻有仍前滋弊者。即行嚴參。毋得姑容。○六年。諭朕向來聞得廣東徵收糧米需索扣剋甚屬累民。持於乾隆四年六月頒發諭旨。令該督撫悉心稽查。嚴行禁革。今留心訪查。廣東徵收銀米之弊。並未革除。收本色則浮加斛面。收折色則高擡價值。以及管倉家人倉書斗級各項陋規。合算民間納米每石費至加倍有餘。且上司衙門所用食米。名曰發價。其實繳還種種弊端。上下蒙混。從前奉行不實之咎。誠屬難

遠若非嚴加整頓何以除民困於將來著交與巡撫澈底清釐實心辦理務令弊端悉剔苛累永蠲始於地方有益如再有翫忽則各在該撫○又

諭

國家愛養黎元莫先於輕徭薄賦朕御極以來加惠閭閻凡所以厚其生計而除其弊端者無不留心體察次第舉行近聞各州縣徵糧一事尚有巧取累民之處每至開徵之際設立滾單將花戶姓名及應完條銀數目開列單內散給鄉民原使鄉民易知得以照數完納前人立法本善而無如姦書蠹役日久弊生視各戶之銀數多寡於額糧之外或多開數錢至

數分不等。鄉民多不識字。且自知糧額者甚少。既見為官府所開。遂照數完納。即有自能覈算者。又以浮開為數無幾。不肯赴官控告。結怨吏胥。且恐匍匐公庭。廢時失業。往往隱忍不言。勉強輸納。其多收之銀。或係書役先將別戶錢糧侵收挪用。而以此彌補其數。或通縣錢糧正額業經報完。而於捲尾之時。兜收入己。更有不肖有司。暗中依分以飽私橐。其申送上司冊籍。則仍是按額造報。並無浮多。至於一州縣滾單之多。動以萬計。而上司難以稽察。無從發覺。其為民間之害。固不減於重耗也。朕聞此弊。各省有之。而

江浙為尤甚。用是特頒此旨。通行曉諭。是在各省督撫仰體朕心。時加訪察。如有仍蹈此弊者。即行嚴參。不稍寬貸。則官吏不得假公行私。而小民共受其惠矣。○五十五年

諭江蘇高郵州書吏私雕假印。偽串冒徵。百姓胥受其愚。而句容縣糧書侵用銀糧。盈千累萬。皆係以完作欠。歷年吞蝕。由此而推。可見閭閻受國家百餘年培養愛育之恩。深仁厚澤。無不浹髓淪肌。窮年力作之餘。皆思踴躍急公。輸將恐後。而囊書猾吏等。假捏串票。任意侵漁。使小民急公奉上之誠。轉為若輩私肥。

實索之計甚而地方官知朕無時不以惠養黎元藏
富於民為念輒思積欠過多自必蒙恩豁免因而急
於徵催影射入己作為未完者恐亦不少朕臨御五
十五年勤求民隱孜孜不倦凡遇水旱偏災無不先
期諮詢重則加息概予蠲免輕則准其分年帶徵俾
窮檐蔀屋咸躋盈寧朕之於民未嘗不體恤周至乃
督撫牧令等既不能宣達朕意又使書吏從中侵蝕
豈得謂尚有人心者乎愚民易於欺虐不受姦吏重
徵之累已屬倖免寧有應交正項錢糧敢於遲延觀
望也封疆大吏皆係受朕委任重恩不於此等關繫

民生休戚之事。盡心稽查。則其他更不可問矣。嗣後各省督撫等。於藩司奏銷之期。務將未完各項。是否實欠。在民悉心體訪。徧行曉諭。務使急公之戶。不受重徵。方為無忝厥職。現在高郵句容二案。接踵發覺。想各省亦必有似此者。俱著澈底清查。毋任官侵吏蝕。虧帑累民。令各省將此旨榜示通衢。俾咸知朕意。

○嘉慶十二年

諭各省丁賦。關繫度支經費。國家生齒日繁。費用倍增。我朝取民有制。從無加賦之事。惟藉此每歲正供。量入為出。豈容稍有虧欠。乃江南等省。自嘉慶元年以

來至十一年止。尚有據報未完銀八百八十六萬餘兩。朕廑念民依。凡稍有災歉之區。無不降旨施恩。立予蠲緩。現在戶部摺內。尚有緩徵帶徵銀三百八十五萬餘兩。不在此數。則小民具有人心。於歲入正供。自當輸將踴躍。即聞有拖欠。亦何至多至數百萬兩。總由地方官任意因循。徵催怠惰。甚或有侵挪虧蝕。情弊皆未可知。而上司護惜屬員。往往曲為地步。凡涉參限將滿。俾接徵之員。另行開限。州縣恃有此規避之法。又復何所做畏。無怪乎各省積欠如此之多也。嗣後州縣遇有錢糧處分。參限將滿。戶部隨時知

照吏部不准調署他處。如該上司違例調署者，將該上司一併叅處督撫等務。當督飭所屬各行激發天良，於應徵款項按限催徵，不得任意因循。罔顧國計。

○十三年

諭嗣後遇有調署人員，著將該員名下詳查果無應徵未完錢糧，咨部覈明方准調署。如有經徵叅限屆滿違例調署者，將該督撫查叅示儆。仍著各督撫將節年積欠銀兩一體立限嚴催，並確查是否實欠在民。如各州縣有從中侵挪虧蝕情弊，立即指名叅辦。務期國課得就清釐，毋得仍前延宕。○道光二年

諭前據直隸藩司屠之申奏直隸差務殷繁議請每地一畝攤徵差銀一分以均徭役當經降旨批示俟顏檢到任後妥議奏聞再降諭旨茲據顏檢查明據實覆奏該藩司減差均徭之說實不可行所論極是賦役之制東南則賦重役輕西北則賦輕役重立法至為深厚若如該藩司所奏是欲役重而賦並重其意何居嗣後直隸辦理差務著顏檢嚴飭該管道府仍遵舊章各就地方情形斟酌妥議該督仍隨時查察該州縣如有能體察民艱公平允協之員據實保舉其有聽信書役任意浮派苛累者指名糾參治罪若

有劣衿藉端包攬。乃民串通妄控者。立即審明。按律嚴懲。則吏治自肅。而民生可期。日裕矣。至屠之申。未能體察情形。冒昧陳奏。意在藉賦以收減差之實效。不知適藉差而添加賦之虛名。累官病民。其弊不可勝言。屠之申著交部嚴加議處。○七年

諭各省州縣經徵錢糧。往往因規避處分。墊完民欠。已易啟虧挪之漸。且有差役墊欠。並非該花戶輸將。不力。竟係書差為加倍取償地步。致畸零小戶。僻遠編氓。更滋苦累。著直省督撫將官墊名目。差墊弊端。一體永行禁革。如有仍蹈前轍。以欠作完。挪移規避者。

責成該管上司嚴行查察有犯必懲其差役墊欠敢
向花戶苛索重利取償該管州縣不即查明究辦別
經發覺除將書役按律治罪外仍將該管州縣從嚴
議處以重考成而恤民隱○十二年奏准廣東綏徭
廳應徵徭糧向有胥吏催徵不免抑勒嗣後統
令徭長屆期率領徭戶自行赴廳交納不准胥
吏經手催科以免需索違者許徭長稟官重懲
○二十二年咨准湖北崇陽縣徵收錢漕行戶
自行赴櫃赴倉交納截券回家如有生監包攬
該管官不行查出照失察紳衿貢監生員包攬

錢糧例議處。儻花戶仍託書差交納。本管官知情故縱。照故縱例議處。止係失察。照失察書役犯贓例議處。仍責成該管道府隨時稽查。○同治三年

諭浙東各屬錢糧浮收之弊。經左宗棠覈減。將正雜錢糧統照銀數徵解。一切攤捐名目及陋規等項。概予革除。嗣後不准再有紳戶民戶之別。其地方官吏儻敢陽奉陰違。添設名目。格外需索。及大戶不遵定章完納者。即著該督撫查參懲辦。○四年

諭馬新貽奏覈減金華衢州嚴州處州四府屬浮收銀

米一摺。浙江省各屬浮收錢糧。疊經左宗棠等查明奏請覈減。茲復據馬新貽奏稱。查明金華府屬共減去錢十五萬六千一百餘串。米五百二十餘石。衢州府屬共減去錢十萬三千九百餘串。米六十五石。嚴州府屬共減去錢六萬一千九百餘串。處州府屬共減去錢六千八百餘串。洋錢八千二百餘圓。米一百二十餘石等語。即著照覈減新章辦理。永遠遵行。嗣後地方官。斷不准別添名目。於定章之外。任意需索。紳民人等。亦須遵照定章完納。不得再分大戶小戶。致滋偏重。該撫仍當隨時查察。儻有前項情弊。即著

從嚴叅辦以重國賦而恤民瘼○五年

諭楊岳斌奏甘肅歲徵額糧請概復舊章以備軍食一
摺甘省歲徵起存上下色糧四十八萬餘石耗羨糧
七萬一千餘石前經已革護理陝甘總督恩麟奏明
於兵少糧多之撫彝張掖等廳州縣分別改徵折色
以備轉撥茲據該督奏稱近來甘省糧價昂貴每麥
一石視前所定折徵二十之價已增至十數倍以此
價估撥兵丁不能餬口而州縣侵漁中飽掊克愈重
屆期轉撥則又任意支吾以致兵糧不給儲積全無
等語甘肅地方瘠苦軍民乏食自酌徵折色而後公

私交因儲待一空。民賦軍糈兩受其弊。自應迅復舊章。以圖補救。著照該督所請。自同治五年起。額徵正耗糧石。仍歸本色。並不分上下兩忙。並著該督嚴飭各州縣。潔己奉公。務使惟正之供。概入倉儲。用備緩急。儻有不肖。牧令仍敢勒折侵挪。狃於積習。即著按照違誤軍需例。嚴叅治罪。以重軍食。而儆效尤。○光緒八年。奏准安徽省各州縣。於開徵之先。凡編造徵冊。務須分鄉分保。查明某戶的實姓名住址。田畝若干。應完銀米若干。一一詳註冊內。其推收過割之田。不准以堂名等項。含混開報。其

徵冊有專簿堂名另設事名及仍沿從前堂名
並在別處寄住者均令於完收錢糧時分析查
明於冊內詳加改註繕發由單之時亦以的實
姓名住址照冊填註概不得含混影射致滋弊
混其由單務須實發的戶官為照冊填明蓋印
酌定捐納限期於由單內登註曉示並酌定分
散人數分別都圖限以時中遴委妥實之人由
官酌給飯食責令依限散給各花戶不再派里
書領散如有逾限不給准花戶指名控究其有
某戶自願來城領給者悉聽其便各花戶於由

單散給之後均照單內註限自行赴櫃投納逾
限不繳由官分別捉催究治凡花戶赴櫃完竣
隨時掣給印串不經里書之手以杜指名之弊
其小戶錢糧數在一兩以下住址寫遠者照湊
數附納於串內註明附納字樣如在一兩以上
及為數雖少情願自納者仍聽自封投櫃不准
由里書代納如有紳戶包攬等弊一經查出即
由州縣稟請斥革照例詳辦儻各該州縣有將
由單仍交里書散發者不能實發各戶或將串
票先行裁給里書轉交者一經查出或別經發

覺官則嚴叅里書依例處治如有侵挪侵蝕照
例計贓科罰○十年

諭御史屠仁守奏湖北錢糧任意浮收又不當時給
票以致鄉民藉候甚或被催重納為害最甚等語
錢糧正供徵納悉有定則豈容姦胥蠹役藉端擾
累著湖廣總督湖北巡撫飭令各州縣查照定例
按戶掾給易知由單嚴算明晰納戶持單投櫃換
票不准濫設催役名目櫃書如有刁難情事准具
稟訴懲治儻州縣意存袒庇即著嚴行叅辦